

**PEMBERITAHUAN PERTANYAAN LISAN
MESYUARAT KEDUA, PENGGAL KEEMPAT,
PARLIMEN YANG KE-13, DEWAN RAKYAT**

PERTANYAAN : LISAN

**DARIPADA : DATO' SRI HJ ABDUL AZEEZ BIN ABDUL
RAHIM
(BALING)**

TARIKH : 18 MEI 2016 (RABU)

NO. SOALAN : 142

SOALAN : Minta Perdana Menteri menyatakan adakah pihak Kementerian berhasrat untuk memberi nafas baru atau menaik taraf Skim Rondaan Sukarela dan Rukun Tetangga di mana mereka akan menjadi persatuan atau pertubuhan di mana mereka akan mempunyai bajet sendiri dan ahli-ahli akan mempunyai elaun untuk perkhidmatan masing-masing.

JAWAPAN :

Yang Di Pertua,

Kerajaan melalui Jabatan Perpaduan Negara dan Integrasi Nasional (JPNIN) sentiasa memberi keutamaan kepada usaha-usaha menaik taraf dan membangunkan komuniti melalui Kawasan Rukun Tetangga (KRT)

dan Skim Rondaan Sukarela (SRS). Seajar dengan usaha menaik taraf ini, pemerkasaan KRT dan SRS dilakukan selari dengan pembangunan semasa sehingga menjadikan pertubuhan ini mampu berdikari dan menjana pendapatan sendiri. Antara tindakan yang diambil untuk membantu KRT dan SRS memantapkan dana dan tabungan Jawatankuasa berkenaan khususnya bagi tujuan kemendirian pertubuhan tersebut sekaligus membantu membangunkan ekonomi komuniti persekitarannya adalah seperti berikut:

- a) **Menyediakan ruang dan peluang dari segi latihan kemahiran dan fasilitator** kepada kawasan Rukun Tetangga (RT) yang berpotensi membangun dari segi projek-projek ekonomi. Antaranya latihan kemahiran penghasilan produk dan teknik pemasaran serta latihan kemahiran pengurusan dan pengendalian keusahawanan dan perniagaan. Latihan ini dikendalikan oleh agensi-agensi atau badan-badan berkemahiran yang mampu membantu membangunkan projek-projek ekonomi di KRT berkenaan. Antaranya adalah Projek Inovasi Sosial RT "Digital Mall" yang membantu menyediakan kemahiran untuk meningkatkan kualiti produk RT melalui kaedah pemasaran secara atas talian dengan mengambilkira bantuan kepakaran penilaian kualiti produk atau perkhidmatan yang ditawarkan KRT serta kemahiran dalam mengiklankan produk dan perkhidmatan berkenaan.
- b) **Membantu mewujudkan jaringan kerjasama dengan badan-badan usahawan yang telah berjaya sebagai *role model* dan fasilitator melalui Program J-Nita.** Program ini dijalankan dengan kerjasama UniKL dan lain-lain agensi yang berkaitan bertujuan untuk

membangunkan potensi produk ekonomi yang dihasilkan sekaligus memupuk kesungguhan komuniti membangunkan sendiri projek-projek ekonomi yang berpotensi berdasarkan hasil bumi dan produk IKS kawasan masing-masing. Beberapa KRT seperti KRT Telaga Batin Terangganu, KRT Ketereh Kelantan dan lain-lain kawasan sekitar Kuala Lumpur dan Selangor yang telah berjaya membangunkan projek ekonomi komuniti melalui usahasama semua pihak berkaitan di kawasan Rukun Tetangga berkenaan.

- c) **Memberi dan menyediakan ruang integrasi yang kukuh dari segi pembangunan ekonomi melalui Program Komuniti Ekonomi Rukun Tetangga Integrasi Nasional (KENAL)** yang melibatkan perhubungan dan perkongsian pengetahuan dan kemahiran ekonomi antara Semenanjung dan juga Sabah dan Sarawak. Antara lain tujuannya adalah untuk meneroka sumber dan kawasan yang berpotensi untuk dibangunkan dan diusahakan menjadi kawasan pembangunan projek ekonomi komuniti khususnya di kawasan RT bagi menjana pendapatan khususnya golongan belia yang berminat dalam bidang ekonomi.
- d) **Menyediakan platform pengiktirafan dan penganugerahan kepada pencapaian dalam pembangunan ekonomi oleh Rukun Tetangga.** JPNIN menggalakkan penglibatan komuniti dalam pembangunan ekonomi dengan menganjurkan Program Anugerah Perdana Rukun Tetangga sebagai platform mengiktiraf pencapaian komuniti KRT dalam pelbagai bidang termasuklah pencapaian Anugerah Projek Ekonomi Cemerlang. Antaranyas KRT Bukit Kuda

Labuan yang memenangi Anugerah Projek Ekonomi Cemerlang, KRT Taman Sri Mawar Seremban, KRT Taman Putri Keluang Johor dan lain-lain KRT yang berjaya menerima Anugerah Projek Ekonomi Cemerlang dengan mengetengahkan pencapaian cemerlang projek ekonomi masing-masing.

- e) **Menggalakkan Inovasi dalam pembangunan ekonomi KRT** dengan membuka ruang untuk komuniti mencipta kreativiti dengan penghasilan projek-projek inovasi yang mampu menghasilkan pulangan yang memberangsangkan kepada ekonomi KRT. Antara kejayaan yang dicapai KRT dalam penghasilan projek inovasi adalah Projek *Unity Alarm* yang mendapat tempat ke-3, Projek *Unity Drum Urban Farming* mendapat tempat ke-2 serta Projek Inovasi *Walki to Phone* yang memenangi Anugerah Produk Terbaik peringkat Anugerah Inovasi Jabatan Perdana Menteri.

Memandangkan Rukun Tetangga adalah pertubuhan sosial, ia merupakan sebuah organisasi yang bersifat sukarela dan ahli-ahlinya digalakkan agar mengamalkan semangat kesukarelaan dalam menguruskan KRT dan SRS serta bertindak secara proaktif dan berdikari untuk menjana sumber pendapatan sendiri melalui pembangunan projek-projek ekonomi bagi meningkatkan taraf hidup masyarakat setempat sekaligus menjadi pemangkin kepada kesejahteraan komuniti.

Sekian, terima kasih.